

VATAN

Dilrabo Bobomurodova

Zulmli shamolda shamday o'chdim-u,
O'zinniki qolib o'zga quchdim-u,
Tilimdan,yo`limdan,dindan kechdim-u,
Baribir boshimni silading,Vatan,
Menga oq yo`l,umid tilading,Vatan.

O'tmishing o'rganmay burishganda yuz,
Xazonmas, tosh yog'di,so`ldi qorako`z,
Qarshingda bosh egib,topolmadim so`z,
Shunda ham boshimni silading,Vatan,
Meni kelajakka yo`llading,Vatan.

Bag`ringda ko`kardim men—nozik nihol,
Asrading beminnat,o`stirding halol,
Har qanday chog`imda kelmadim malol,
Onamday boshimni silading,Vatan,
Otamday quvvatlab,qo'llading,Vatan.

Farzandlar aylanib nomus,oringga,
Dosh berib doimo yo`g`-u boringga,
Dilrabo yarasa deyma koringga,
Senga muhabbatim yo`llagum,Vatan,
Bolangman,bag`ringda gullagum,Vatan.

Otam uyi

Keng qasrga kelin bo`l,
O`z oshyoning bo`lakcha.
Ota uyi oldida
Bu dunyo bir ko`lmakcha. (M.Yusuf)
Palahmonning toshi kabi otishadi,
Qiz bolani arzon-garov sotishadi,
-Sog`-omonmi? Tag`in o`ylab yotishadi,
Otam uyin havosini sog`inaman,
Teraklarning navosini sog`inaman.



“Xola-xola” o’ynab xola bo’lib ketdim,
Yuraklarga yupanch,nola bo’lib ketdim,
Sog’inchlarda tilka-pora bo’lib ketdim,
Otam uyi-bolalagim sog’inaman,
Murg`ak gul-u lolaligim sog’inaman.

Onalarning qizlar chin dilbandi ekan,
Otalarning shirin,asal,qandi ekan.
Lek baribir sog’inchlarga bandi ekan,
Men ularning o’zlarini sog’inaman,
Mehr to’la ko`zlarini sog’inaman.



-Uyingizda cho`ri bo’lib qolay, ota,
Qalbingizning qo`ri bo’lib qolay ,ota,
Peshonangiz sho`ri bo’lib qolay ,ota,
Tanbehlarni,nolishlarni sog’inaman,
Sizdan dakki olishlarni sog’inaman.

-Qiynamagin,-deysiz,-qalbim o`rtab , qizim,
Eski og`riq, yaralarni tirnab,qizim,
Sog’inmagin har kun meni qiynab,qizim,
Onang bilan sho`xliklaring sog’inamiz,
Sen sog`insang, biz bu yoqda og`rinamiz.

Endi faqat mehmon bo’lib borarkanman,
O’zga uyga o`z go`sham deb qararkanman.
Ota uyda qachon yotib qolarkanman,
O`sha uyning devorlarin sog’inaman,
Tunda yulduz diydorlarin sog’inaman.

Ko`ngim kelmas, urf-u odat ta`siri—shu,
Ko`ngim kelmas, kattalarning tadbiri—shu ,
Ko`nmay netay, Dilraboning taqdiri—shu ,
Aytolmayman,nimanidir sog’inaman,
Borolmasam,she`r yozaman,ovunaman.